

周

易

揆

序

四經皆有定論易不
可以定論二者也非
不可定至定者存於

畫遂能包天下不定
之論而無所不有無
所不通商瞿而後言
易者多鄭釋天象王

疏人事說者猶或非
之趙宋以來易學大
明邵子之言曰易於
時配春子事屬皇於

性繫仁是揆諸氣者
也程子之言曰易變
易也隨時變易以從
道也是揆諸理者也

或問卦象于朱子朱
子曰便是理會不得
是揆諸象者也三賢
各得其一而易之大

全無不畢見然則以
定論二易者拘于易
之辭未通於易之畫
者也張子曰悟後心

嘗弘觸理皆在我術
內斯言近之矣我年
友塞菴先生立朝當
否泰之交則為包荒

出世丁興亡之會則
為碩果以故學識所
至既過前賢晚年耽
味益深所著易揆一

書余受而讀之時抒
獨見旁輯諸家潔淨
精微直與易契而余
所服膺者尤在卦前

設互卦後設對卦兩
設分合直舉所謂氣
與理與象莫不兼融
而並攝之何也三才

分六位初二為地三
四為人五上為天二
地位居其盡無事于
五人則上下乘承可

合可離相生相接而
消長之道伏焉故六
位分屬則二賢五君
三為諸侯令長四為

太子大臣近臣四爰
皆得以事互初末主
事上已謝事故不得
互自有互而變通無

窮舉凡人事得失正
不能見者互潛見之
此氣所蓄然也是編
首揭互卦則一定者

既不阻其旁通已然
者并不遏其未見是
先生之論氣簡於邵
而詳于邵矣卦有反

對所謂綜也有四正
綜而氣之定者見有
四隅綜而氣之變者
見以正綜隅以隅綜

正而氣之平者見順
逆既得象隨以立變
化多寡均適其平上
經陰多于陽者八爻

下經陽多于陰者亦
八爻是象之大中隨
時非若太玄潛虛以
艱深疑人也且乾坤

坎離中孚頤大小過
有錯無綜先生特設
反覆為對之義即以
錯為綜而以十二爻

合斷其旨則又窮其
變而通其理觀乎象
外以發先賢所未發
是先生之論象變于

朱而深于朱矣若六
十四卦之合為三十
二蓋數之相周自有
乘除此即天運之終

始也閱正忘反是知
進不知退也閱反遺
正是知退不知進也
兩卦交繹其旨彌變

如屯蒙易位在屯則
雷在蒙則山矣如小
畜履易位在履則澤
在小畜則風矣必兩

卦分卷而後非偶者
不相雜如屯可繼坤
必不可合坤本與末
之辨也師可繼訟必

不可合訟兵刑不可
偏見也卷數之分合
明則有分而井疆脩
有合而關隧通是先

生之論理備于程而
嚴于程矣昔孔子韋
編三絕始悟義之圓
圖為錯文之序卦為

綜歎其不可典要先
生深得此意故對互
分合極盡易畫之妙
而無所不有無所不

通是以時而委心任
運則為莊周之達生
時而處險濟危則為
瞿曇之撒手流行坎

止不與天爭層見側
出無非易理然則是
書也不特揆之四大
聖人而合即揆之三

教聖人而亦無不合
者昔賢謂六畫先後
次序全是天理自然
古人只是見得分明

不曾一毫智力添助
善哉揆易乎吾于易
揆亦云

五茸衲弟如覺原

言序
名許譽卿題于泖

上之了菴

序

夫易何以名經上者常
也又經何以取易上者
變也常而不變即是死
法變而不常便屬多機

惟變惟常此易之所以
成經也故河出圖洛出
書山川之所以效靈則
仰而觀俯而察聖王之
所以取象豈徒然已哉

均此奇偶耳夏有連山
殷有歸藏皆不能垂後
代而惟周易為萬世不
易之道百生不易之法
又不易之所以為經也

然則二代之書有繫詞
如文王周公者不有十
翼如孔子者不有遭厄
于暴秦而不燬者不政
所謂斯文之在茲也况

若他經或藏于壁或出
諸塚或散逸而不全寧
比此經安然同日月之
在天而江河之行地哉
蓋測陰陽之消息與傳

帝王之功業理事固殊
推氣化之密運與調人
心之和平隱顯六異而
且生天生地者兩儀之
祖也資始資生者乾坤

之蘊也四時行而百物
生者元亨利貞之周流
不息也易之時義大矣
哉更推廣之却與楞嚴
唯識相為表裏何則其

圓相中有白黑各半詎
非阿賴耶識之真妄雜
糅乎其太極之生于無
極詎非楞嚴之虛空生
於大覺中乎其義皇未

畫以前詎非威音那畔
之未始有物之先乎如
程子畧有見處則曰讀
一部楞嚴不如看一良
卦彼雖高推易義卑抑

佛乘猶識二經相類之
處獨丞相李綱所答友
人書以華嚴與周易對
勘縱廣數千言其辨析
精微既欲以儒理申又

不欲以佛理屈和會兩
家必非無謂而發也於
是乃知善易者必須淹
通內典了徹圓宗方得
于此理極深而研幾蓋

所謂寂然不動者即定
也感而遂通者即慧也
無思無為者即三昧正
受也洗心退藏於密即
不思議境界也故曰西

方有大聖人焉其心同
也其理同也其化民成
俗之跡則不同也塞菴
先生夙有根智以休
之度飭謹之躬其留

心於良背之學久矣歸
田已來更刻意於摩訶
止觀及大佛頂經暇則
游蕲于漆園借南華之
消搖曷天竺之沉密然

則俱非公之駐足地也
復從周易而揆度之孰
是先天之範圍孰是後
天之作用吾心之幾微
孰是七日之來復旦晝

之結亡孰是碩果之不
食如是乃至一爻一象
一卦一策無不從而揆
度之至於章句之間剖
斷之際既不進古人為

全是亦不退今人為全
非一以公道衡之夫是
之謂周易揆
教下衲子天台衍門
正止謹序

周易揆卷目

卷之一

乾卦至蒙卦

卷之二

需卦至大有

卷之三

謙卦至賁卦

卷之四

剝卦至離卦

卷之五

咸卦至明夷

卷之六

家人至益卦

卷之七

夬卦至鼎卦

卷之八

震卦至旅卦

卷之九

巽卦至未濟

卷之十

繫辭上傳

卷之十一

繫辭下傳

卷之十二

說卦傳

序卦傳

雜卦傳

周易揆卷目

終

周易揆卷之一


嘉善塞菴錢士升著

上經

周禮太卜掌三易之法一曰連山二曰歸藏三
曰周易連山首艮歸藏首坤周易首乾題周別
於殷猶周書周禮易緯云因代以題周是也乾
鑿度曰易一名三義易者其德變易者其氣不
易者其位乾坤坎離四正卦居上經震巽艮兌
四偏卦居下經分成六十四卦乾坤坎離之分

體在上經爲主在下經爲客震巽艮兌之分體
在下經爲主在上經爲客

乾



乾下
乾上

郝仲輿曰天地之氣陽而已矣陰非陽敵偶隨
奇生奇者一其兩也偶者兩其一也一乘兩兩
承一故曰奇生偶應卦成于三者何也曰畫一
得三一分二二與一卽三二者一奇之判爲兩
三者奇與偶之累而上也混元如規一橫中斷
則上下成兩合中爲三一直中界則左右成兩

對中爲三一乘兩間卽陽之乘陰兩挾一畔卽陰之抱陽故德莫大于乾數莫神于一莫變于奇偶莫該于三聖人卽三奇名爲乾卽三偶名爲坤其實一乾而已矣

乾元亨利貞

卦者掛也言懸掛物象以示人也三畫以象三才寫天地風雷山澤水火之象故謂之卦也卦必六畫者陰生于午陽生于子陰陽之氣自下而上各有六節也乾本象天天積諸陽氣而成

乃不名天而名乾者天其體乾其用也聖人教人法天之用不法天之體也

元始也亨通也利和也貞正也文王以四德贊乾之盛他卦雖各有四德而偏全純駁不同以其四德狹劣故以餘事繫于其下非乾之無所不包也

初九潛龍勿用

九者陽數之全初者一之方生六畫皆不離一六龍皆不忘潛二之謹信閑存三之惕四之或

皆潛意也至五神力始完而亢卽隨之故初曰
勿用用亦无首六龍无首則六龍皆潛也

龍行天之物故以象乾馬行地之物故以象坤
河圖之數十洛書之數九而一皆居下故一爲
初數始一終十而五居中前後各四合爲九故
陽數極于九而十爲餘蓋圖數爲體書數爲用
所以大衍虛一卽初九勿用之象用其餘則爲
乾之亢龍矣亢于上必反于下爲一之象故陽
用九爲天則

葉石林曰參天兩地而倚數參天一三五也一與三與五非九而何兩地二四也二與四非六而何先儒爲九老陽也六老陰也君子抑陰而進陽故陽用極數而陰取其中耳陰陽天道也豈人所能抑而退強而進哉○一云乾三畫坤六畫陽得兼陰故數九陰不得兼陽故數六九二見龍在田利見大人

六畫卦二居地道上有田象三畫卦二五皆人道有人象陽大陰小二五皆陽大人象二爻變

離物相見乎離有利見象見者見其德故象曰
德博而化

九三君子終日乾乾夕惕若厲无咎

无或作无
非无音既

王弼曰九三上不在天未可以安其尊也下不
在田未可以寧其居也純修下道則居上之德
廢純修上道則處下之禮曠故終日乾乾夕惕
若也乾三處下卦之上故免亢龍之悔坤三處
下卦之上故免龍戰之凶

三四皆以人事成天地之功者故不言龍而言

君子陽爲日三居下乾之終有終日象上下皆
乾兩乾相繼有乾乾象半月爲夕夕對朝看正
日之終也惕字豎心從易豎起此心與日月同
運堯兢舜業正是此惕若語詞形容其淬厲之
心也

九四或躍在淵無咎

躍曰或無必然之應也淵曰在有常定之居也
三四俱稱无咎者三多凶四多懼人道生于憂
患惟兢業一念可以免咎也

九五飛龍在天利見大人

飛龍空行無碍在天廣大無垠雖龍無優劣而分際不同德至此謂之天德非僅以所乘之位言故象曰位乎天德

朱子曰乾六爻自天子至于庶人自聖人至于愚不肖筮或得之義皆有取但純陽剛健之至以義類推之則爲聖人之象而六位高下又似聖人之進退故文言以聖人之迹各明其義位有高下德無淺深也

舊謂乾卦專屬君道若是則天子而下至于庶人皆無分矣又以舜得六爻之全若是則古來帝王非起於有鰥歷試諸艱三十而登庸耄期而禪受者皆無分矣夫乾體人人皆具乾德人人宜體而止爲一人用耶九二之爲君德也三四之爲君子也進而九五而下學上達知我其天卽龍之飛也又進而上九而五十學易可無大過卽亢之悔也故乾者生人日用飲食之事而高推勢分劣視人身豈聖人作易之旨哉

自疏

上九亢龍有悔

不曰九六曰上九五爲參兩之合陰陽之中尊不可尚不欲以六之陰加之故變言上言在五上也陽德貴下喜中而忌上者也初在下二五在中三在下乾之上上乾之下者也四在上卦而能居下惟上九一爻无中无下有上而已无中则无位无下则无民故謂之亢亢旱也龍之居杳冥而不能雨者悔者變也卽洪範曰貞曰悔之悔龍德變化必不至窮而不返故爻詞不

言凶咎止言有悔象與文言亦皆言時而不言德時有亢而德无窮也

易詁云天數中于五自初至五而乾備矣過是悔也東方蒼龍盡于大角故辰稱龍焉其位飛其卦夬夬五陽之卦有上六焉猶未純也退居于辰歷階而升不盡一等焉耳

用九見羣龍无首吉

此因乾卦爲全易陽爻之首故特明用九之義以爲例也陽位六陽數九九盈數也聖人知盈

之不可久也于中位之外欲餘一位以爲五陽
轉身之地所以防亢而遠悔也五進而上盡其
位矣以盡位而挾盈數羣龍不見首乎首在上
而可見者也无首而謂之見者見于不見也用
九者必見到羣龍无首處則窮而變變而通乃
見天則而天下治矣所以无悔而吉蓋用九之
數以表陽之德不盡九之位以善陽之用聖人
于利見不言吉而于見羣龍无首言之其意淡
矣

自疏

彖曰大哉乾元萬物資始乃統天雲行雨施品物
流形大明終始六位時成時乘六龍以御天乾道
變化各正性命保合太和乃利貞首出庶物萬國
咸寧

此夫子釋文王彖辭彖者斷也斷一卦之吉凶
也凡彖因卦象以明天道而人事終之此節首
贊乾元元者萬物之初氣也故曰資始天包萬
物乾元包天故曰統天天地合而雲行陰陽和
而雨施則品物之受氣者流動而形成形矣是乾

元所統之亨也○大明下始卽資始之始曰終
始者猶陽始于子而曰亥子陰始于午而曰巳
午也六位以方言六龍以德言位曰成規之矩
之有定分也龍曰乘左之右之无滯迹也統天
言乾之體御天言乾之用統如身之統四體御
如心之御五官統天者乾也御天者大人之乾
也○乾道下元氣徃來謂之乾道元氣冲融謂
之太和莫之令而令其和謂之命莫之稟而稟
其和謂之性總之一元氣也新故无常爲變消

息无迹爲化變者迹之遷化者神之逝正卽貞也各正者物物歸根也保合者完固不泄也以
上皆言貞而利在其中貞下起元終而復始大明者明此而已○首出下一元爲萬物之始故
曰首出庶物然用九見羣龍无首何也惟元首
所以首出也萬國咸寧各正保合之象

舊解以大明終始四句爲聖人之元亨首出庶
物爲聖人之利貞細玩文義曰終始曰六位曰
六龍似非專屬元亨曰首出庶物似非專屬利

貞且天道聖人前後間隔彖詞亦无此例竊意
此節應有錯簡若品物流行下接乾道變化各
正性命保合太和屬天道大明終始至御天接
首出庶物萬國咸寧屬聖人則文義俱順楊止
菴周易全書與余合

自疏

象曰天行健君子以自強不息

王弼曰天也者形之名也健也者用形者也夫
形也者物之累也有天之形而能永保无虧爲
物之首統之者豈非至健哉

天以氣運重乾不息曰天行健以用也以之而
乾屬君子矣

潛龍勿用陽在下也見龍在田德施普也終日乾
乾反復道也或躍在淵進无咎也飛龍在天大人
造也亢龍有悔盈不可久也用九天德不可爲首
也

陽性上上以下爲本屯之下賤復之下仁益之
其道下下皆潛義也往而來曰復不反則不復
故復曰剛反往來不窮謂之通故曰反復道天

曰玄造曰大造大人御天曰大人造天德指九五此上不可復加故曰不可爲首不可卽勿用之意

文言曰元者善之長也亨者嘉之會也利者義之和也貞者事之幹也君子體仁足以長人嘉會足以合禮利物足以和義貞固足以幹事君子行此四德者故曰乾元亨利貞

文王旣沒文不在茲乎故曰文言此演四德屬之人性而歸于體乾之君子也四德皆善元爲

之長非元无所資始也陰陽和而物生曰嘉利
者遂也使物各遂其生義斯和而不悖卽利爲
義利外无義也自天下知自利而不知利物故
聖人又轉一語曰君子喻義小人喻利而義利
始劃然兩途矣昔人謂凡爲人者是善爲我者
是惡正以利和義之有貞言固者冬日之閉凍
也不固則春夏之長草木也不茂固正所以爲
貞也幹木之本也枝葉旣盡大本獨存貞固之
象寂然不動感而遂通故貞固屬智

自疏

初九曰潛龍勿用何謂也子曰龍德而隱者也不易乎世不成乎名遯世无悶不見是而无悶樂則行之憂則違之確乎其不可拔潛龍也

不易乎世不爲世所易也學者脚根不定爲世所易只爲名心未忘耳若无名心卽遯世不見是何悶之有然龍德雲雨天下不以无悶而忘憂樂故大行可樂大窮可憂行之違之而求名之心確乎不拔此真潛龍也若枯槁者流與草木同腐耳何以進德修業而成雲行雨施之治

哉

九二曰見龍在田利見大人何謂也子曰龍德而正中者也庸言之信庸行之謹閑邪存其誠善世而不伐德博而化易曰見龍在田利見大人君德也

龍德似有神奇而不外庸言庸德正依乎中庸者不中庸卽是邪閑邪而誠自存矣不伐與无悶一脉遞世不損善世不加也德博立人達人也化時雨之化也大人之事備矣故曰君道

乾畫一實則誠坤畫一虛則敬故乾九二言誠
坤六二曰敬

九三曰君子終日乾乾夕惕若厲无咎何謂也子
曰君子進德修業忠信所以進德也修辭立其誠
所以居業也知至至之可與幾也知終終之可以
存義也是故居上位而不驕在下位而不憂故乾
乾因其時而惕雖危无咎矣

三在兩乾上下之際此正發明乾乾惕厲之旨
進德修業正惕厲工夫知至知終上位下位合

乾乾而言忠信是人心真種子真種子下地方會日日發生進而不已所謂崇德也忠信誠也立誠自不妄語始修辭者修省其辭使顧行也上繫終于不言而信養其誠也下繫終于六辭驗其誠不誠也此居業大關鍵處知至知終者三接上卦終下卦至者至乎上也終者終乎下也終卽終日之終知至至之則上達天德故可與幾謂可許其幾及也知終終之則不失行事之宜故可與存義而總由于知者有乾知而後

有坤行也在下卦之上爲上位在上卦之下爲下位知終終之故不驕知至至之故不憂

九四曰或躍在淵无咎何謂也子曰上下无常非爲邪也進退无恒非離羣也君子進德修業欲及時也故无咎

四在上下進退之間一念援上卽是爲邪一念躁進卽是離羣邪與離羣皆先時非及時也不先不後之謂及時及時則雖進无咎

九五曰飛龍在天利見大人何謂也子曰同聲相

應同氣相求水流溼火就燥雲從龍風從虎聖人作而萬物覩本乎天者親上本乎地者親下則各從其類也

此極贊利見之象同聲相應雷風相薄也同氣相求山澤通氣也流溼就燥水火不相射也皆无識而相感者龍陽精而居于淵故能興雲虎陰精而居于山故能運風此以有識感无識皆形容聖作物覩之象動物受氣于天首向上親上也植物受形于地首在下親下也夫萬物所

以親天者天爲萬類之同氣也聖心卽天天體
一如心心相照有不見而親者乎中庸凡有血
氣莫不尊親正此章注脚

上九曰亢龍有悔何謂也子曰貴而无位高而无
民賢人在下位而无輔是以動而有悔也

无位者陽位在五也陰爲民无民者驕陽无陰
也无輔者亢不能下賢也動而有悔靜則无悔
矣不好上而返于潛之謂靜

自疏

潛龍勿用下也見龍在田時舍也終日乾乾行事

也或躍在淵自試也飛龍在天上治也亢龍有悔
窮之災也乾元用九天下治也

此申解爻蘊之情而以人事明之也時舍者田
非龍所猶之傳舍也行事卽反覆道道外无事
事外无道也自試如書試可乃已之試有酌量
意上治乃无爲而治帝力何有之象位當其窮
故有災明非龍之災也上九天象天降曰災用
九加乾元者以乾之元德而用九也

潛龍勿用陽氣潛藏見龍在田天下文明終日乾

乾與時偕行或躍在淵乾道乃革飛龍在天乃位
乎天德亢龍有悔與時偕極乾元用九乃見天則
前言人事此言天道而合之人陽氣潛藏者此
時但有陽氣未有陽光也天下文明則陽光顯
出地上矣與時偕極承上節窮之災言非時窮
能災時窮而與偕極之災也九之爲道非元不
能用惟乾元用九乃見天則天則之見卽元首
之見用而勿用者也

乾元者始而亨者也利貞者性情也乾始能以美

利利天下不言所利大矣哉大哉乾乎剛健中正純粹精也六爻發揮旁通情也時乘六龍以御天也雲行雨施天下平也

此申前乾元統天之旨首提出乾元亨元之亨也性情元之性情也性情獨屬之利貞者品物咸亨性情未嘗不具特當歸根復命乃顯耳嘉會爲美卽亨不言所利卽貞收斂之時神功寂若穆穆无言所謂四時有成理而不說也能以貫至此大矣哉贊乾元也

自疏

○大哉乾乎下

前申言乾元之大此申言乾之大乾道生長遂
成不屈處曰剛不息處曰健不偏邪處曰中正
不駁雜處曰純粹而總謂之精周子太極之真
二五之精妙合而凝老子其中有精其精甚真
是也六爻發揮揮動也散也動而散于諸卦皆
曰旁通不但乾之六爻也而總謂之情中庸喜
怒哀樂發皆中節是也精是情之凝聚結實處
情是精之流動圓徹處自疏○情者時爲之也
時乘六龍下申言聖人合天之旨雲行雨施品

物咸亨前屬天道此卽天卽人矣

君子以成德爲行日可見之行也潛之爲言也隱而未見行而未成是以君子弗用也

此承上乘龍御天申明發揮旁通之有大明終始則德成矣惟隱而未見故行而未成非龍德有優劣也

君子學以聚之問以辯之寬以居之仁以行之易曰見龍在田利見大人君德也

學聚問辯乾之知也寬居仁行乾之健也陽性

躁故居之欲寬勿助勿忘是也前云行此四德
此獨言仁乾元統天也

九三重剛而不中上不在天下不在田故乾乾因
其時而惕雖危无咎矣九四重剛而不中上不在
天下不在田中不在人故或之或之者疑之也故
无咎

九三九四皆重乾故言重剛三不中過乎下卦
之中也四不中不及乎上卦之中也過則憂不
及則疑然憂所當憂卒于无憂疑所當疑卒于

無疑故皆无咎

夫大人者與天地合其德與日月合其明與四時合其序與鬼神合其吉凶先天而天弗違後天而奉天時天且不違而況于人乎況于鬼神乎

同聲節釋利見此節正釋大人天地以理言故曰德日月四時鬼神以氣言故曰明序吉凶天地日月四時鬼神皆天也大人合天故无不合下復推本先天以及後天先天太極未分生天者也後天吉凶已兆御天者也惟先天而天弗

違乃能後天而奉天時先天无時可言

自疏

亢之爲言也知進而不知退知存而不知亡知得而不知喪其惟聖人乎知進退存亡而不失其正者其惟聖人乎

爻詞中曰見曰大明終始曰知至知終此又疊言知退知亡知失知是純乾全體血脉所謂乾則易知也不知則爲亢爲悔知則爲无首爲不失其正貞者正也乾元之用所歸宿也兩言聖人有咏嘆淫佚之思初曰潛之爲言上曰亢之

爲言初上包括六爻故其辭首末相應或曰聖人不辭亢亦不必辟悔故曰其惟聖人詳玩爻辭竝无此意夫往來不窮者易也若如此說則不窮者窮矣六龍无轉身之地而上九一爻乃死句矣三旬之逆不必有文德之敷耄期之餘不必有禪受之事寵利可以久居明辟可以无復悔可勝道邪其何以爲聖人或曰湯武放伐非聖人之亢與曰此乾道乃韋時事德之慙也孟津之再會也疑之也非亢也且亢者无位无

民无輔而以湯武當之不倫甚矣

自疏

坤

坤上

坤从土从申陰起于午至申而三坤三畫皆陰故从申也

坤元亨利牝馬之貞君子有攸往先迷後得主利西南得朋東北喪朋安貞吉

坤之元亨卽乾之元亨也不曰利貞而曰利牝馬之貞者乾之利貞專主成功坤道无成不得自爲貞而以從陽得正爲貞如牝馬之從牡也

馬順而能健牝尤順又牝馬旣從牡矣他牡欲犯之輒蹄齧不可近最爲從一而貞者故取以配乾君子有攸往一句總起下文自體坤者言先後倡隨之義後得主利言利在得主不利爲主也四時天行四方地維故乾以元亨利貞名其行坤以西南東北表其維坤居西南巽離兌三陰屬焉類也是爲得朋艮居東北乾坎震三陽屬焉非陰類矣故喪朋貞曰安所謂不習无不利也惟安貞乃能永貞

王弼曰陰之爲物必離其黨之于反類而後獲
安貞吉正義云若二女同居其志不同必之于
陽是之于反類也凡言朋非惟人爲其黨性行
相同亦爲其黨假令人是陰柔而之剛正亦是
離其黨

彖曰至哉坤元萬物資生乃順承天坤厚載物德
合无疆含弘光大品物咸亨牝馬地類行地无疆
柔順利貞君子攸行先迷失道後順得常西南得
朋乃與類行東北喪朋乃終有慶安貞之吉應地

无疆

乾坤无二元氣之所始形卽至焉其資生也乃
順而承乎天也順積而厚載物之德合乾无疆
含蓄而極其弘靜翕之量也光華而極其大動
闢之化也品物咸亨咸訓感從天施下故于品
物言流從地受上故于品物言咸此坤合天之
亨亦无二亨也牝馬從牡行地无疆地道承天
其順相類行地无疆謂健也程傳云非健何以
配乾未有乾行而坤止者是也以上釋元亨利

貞二句以下釋君子所以體坤者失道失牝馬之道也得常得牝馬之常也西南得朋東北喪朋非得吉而喪凶也孔子恐人誤認其意故釋之曰陰當從陽西南得朋雖與類行不能有生物之慶也東北喪朋得乾爲主乃終有慶耳叅同契言雄不獨處雌不孤居以明牝牡竟當相須假使二女共室顏色甚姝蘇秦通言張儀合媒推心調諧合爲夫妻敝髮腐齒終不相知正是此理剝卦五陰獨三與上應孔子言剝之无

咎失上下也言其失却諸陰而獨應乎乾所以
无咎卽此意體坤如此則貞而且安坤道全在
君子矣故曰應地无疆天言御統御之意地言
應效法之意

象曰地勢坤君子以厚德載物

王弼云地也者形之名也坤也者用地者也夫
兩雄必爭二主必危有地之形與剛健爲耦而
以永保无疆用之者不亦至順乎
地以形載重坤綿亘磅礴故曰地勢坤

初六履霜堅冰至○象曰履霜堅冰陰始凝也馴致其道至堅冰也

舉正陰始凝也上誤增堅冰字

坤初六陰始也卽姤之初爻于時爲五月而云履霜堅冰至者干寶謂五月陰氣始動于三泉之下而漸至于履霜堅冰皆指未然而言

王伯厚曰乾初九復也潛龍勿用卽閉關之義坤初六姤也履霜堅冰至卽女壯之戒

有陽不可无陰有雨露不可无霜雪故隕霜不殺春秋必書桃李冬華史冊所異陽氣發陳全

賴一番寒徹只在順陽與不順陽耳順則肅殺
卽是陽生不順則陽生變爲肅殺而順不順必
須辨之于早履霜堅冰至正辨之于早者履者
牝馬之行六爻皆其履歷之地而初爲下爲足
故以爲象諸卦初爻多取象于履噬嗑離皆是
也象曰馴致其道馬調良曰馴卽牝馬也致其
從陽之道自履霜至于堅冰而无不順所謂得
主有常也初六一爻總括六爻與乾初九一爻
同近說不達馴致之義以順乃順陰故有此戒

詞彖明言順以承天不承天卽逆何以名順豈

坤道有二順耶

自疏

六二直方大不習无不利○象曰六二之動直以方也不習无不利地道光也

此爻居中得位極于地體故盡極地之義自其有施卽受有受卽生陽氣到來更无壅闕曰直自其布陽氣于四方周正罔缺曰方自其厚德載物配合无疆曰大直方而坤之至爲乾之大矣陽大陰小陽動陰靜今言大言動皆主從陽

而言此直方大本自太極所分何待于習不習而利其安行之聖乎象于六二提出動字蓋坤之直方大不可見動而承天乃見之光卽化光陰虛受陽如月附日全體皆陽光光卽文也

胡氏曰乾五爻皆取象惟九三獨指其性體剛健者言之坤五爻皆取象惟六二獨指其性體柔順者言之又云三多凶故聖人于乾坤第三爻其詞獨詳

六三含章可貞或從王事无成有終○象曰含章

可貞以時發也或從王事知光大也

六三處下卦之極而不疑于陽雖位不中正惟以牝馬行之剛柔相雜曰文文之成者曰章剛動柔繼之含章也可貞卽貞可發則發下卽以或字接之或者不敢自決之詞從者不敢造始之意一事而始之終之曰成萬物資始于乾坤特資生而代乾終事耳故曰无成有終象曰以時發者待六五之時而發于事業也知光大者時發從王固是坤能實本乾知蓋乾知坤能實

非截然爲二故乾于四德曰行坤于光大曰知
胡氏曰陽主進陰主退乾九三陽居陽故曰乾
乾其德主進也坤六四陰居陰故曰括囊其位
主退也乾九四陽居陰坤六三陰居陽故皆曰
或進退未定之際也特其退也曰在淵曰含章
惟進則皆曰或聖人不欲人急于進如此

六四括囊无咎无譽○象曰括囊无咎慎不害也
六四上下皆陰闔而又闔明非君子向用之時
苟有不慎自見其美取咎取譽皆非從陽之道

惟牝馬行之慎藏其美如結囊之口視含尤密
矣坤中虛囊象坤三索得兌兌爲口有含意一
索得巽巽爲繩有括意易多言无咎此曰无咎
无譽者莊子云名者相軋也爭之器也嚴君平
云予我名者殺我身故有譽卽有咎美里之難
天王聖明居東之歸赤易几几以避譽也正以
免咎也蓋下卦之初已有堅冰之慮復交一坤
陰勢愈盛安得不慎耶象曰慎不害言其无失
不言有得得則譽矣

胡氏曰六三含章六四括囊蓋六三以陰居陽
猶或可出而從王事六四以陰居陰惟可括囊
不出而已

六五黃裳元吉○象曰黃裳元吉文在中也

大傳垂衣裳而天下治取諸乾坤蓋合二卦上
下相重而取象乾爲上衣坤爲下裳也周官內
司服掌王后六服四曰鞠衣注謂黃衣也詩綠
衣黃裳綠衣喻妾黃裳喻夫人言黃裳于坤六
五則知爲乾九五之配矣坤純陰嫌于言君又

不可以臣當之故取象于后以存君位又嫌于
敵乾故象下裳示坤當下于乾也聖人謹于君
臣之辨如此

文在中者六二中而不文六三文而不中故直
方但言其德之中含章但戒其華之露惟六五
當之

上六龍戰于野其血玄黃○象曰龍戰于野其道
窮也

此順道原始要終馴致其道至堅冰也舊說皆

以戰爲陰陽相戰血爲陰陽兩傷履霜之初已
能早辨豈至爲亂臣賊子之事況陽屬氣安得
有血乎惟陰窮于亥下伏乾龍窮陰薄陽戰之
象國外曰郊郊外曰野坤位未申之維而溢于
酉戌之間于野之象其血玄黃者乾動則震震
爲龍又爲玄黃蓋坤終而乾又始矣初辨于早
上辨于疑牝馬之貞到底不迷如此象曰其道
窮不言窮之災者從陽之德雖窮而无悔也

自

疏

用六利永貞○象曰用六永貞以大終也

此明用六之義爲全易陰爻之例乾位六而爻用九故陽以无首爲吉坤位六而爻亦用六故陰以永貞爲利永貞者陰以終陽亦永貞此早辯之一念而已陽大陰小故曰以大終

文言曰坤至柔而動也剛至靜而德方後得主而有常含萬物而化光坤道其順乎承天而時行此申全卦之義柔靜本是坤德惟順天而動故剛而能方剛卽直也後得主而有常承動而剛

含萬物而化光承靜而方乾道剛健中正純粹
精坤只在順時乘時行總一時而已

積善之家必有餘慶積不善之家必有餘殃臣弑
其君子弑其父非一朝一夕之故其所由來者漸
矣由辯之不早辯也易曰履霜堅冰至蓋言順也
德莫善于順莫不善于不順順之積積善也不
順之積積不善也餘慶餘殃于此分途而積必
由于漸亂臣賊子只不順一念爲之造端緊關
全在早辯從一念之微以乾知辯勘不使無主

而昧履霜堅冰至乃順陽第一義故曰蓋言順也

直其正也方其義也君子敬以直內義以方外敬義立而德不孤直方大木習无不利則不疑其所行也

二其字俱指六二坤之直乃其心之正也坤之方乃其事之義也變正爲敬敬是正下手工夫不踰之矩有方象直內與乾同體方外與乾同用健順配合夫又何孤不疑其所行者坤行承

乾知無可疑也又乾四以陽居陰坤三以陰居陽故皆曰或或之者疑之也六二以陰居陰居中得正何疑之有上六疑于陽何也不疑者坤之動也疑者坤之窮也竝行不悖也

陰雖有美舍之以從王事弗敢成也地道也妻道也臣道也地道无成而代有終也

爻言无成此言弗敢成原坤從陽之心也亂臣賊子只是敢之一念老子所謂勇于敢則殺也代有終者代繼也陽施盡則無繼矣陰受其蒺

實而胎養之以待嗣歲之復生所以繼之使有終也

乾能始萬物而已必賴坤以作成之代終之終正對乾之始而言董子云地出雲爲雨起氣爲風風雨者地之爲也地不敢有其功名必歸于天故曰天風天雨下事上如地事天可謂大忠矣又以數言之天數終于九不足于終代其終者地十也

天地變化草木蕃天地閉賢人隱易曰括囊无咎

无譽蓋言謹也

陰虛受陽而曰閉者陽不下施陰無所受故也
乾鑿度曰坤道有閉注云閉塞源脉性不發泄
萬物不化名之括包大道將敗名曰道匿前言
慎此申言謹所以明六四之順者至矣

君子黃中通理正位居體美在其中而暢于四支
發于事業美之至也

坤爲黃五爲中中體虛明通徹條理爲通理六
二直內方外兩致其力至五則內外通貫无所

容其力矣正六五之位居下震之體三之以時發者此其時矣在中之美无不暢發故曰美之至

朱子曰天地之間萬物粲然而陳者皆陰麗于陽其美外見者也六三六五皆以陰居陽故三曰陰雖有美五曰美在其中然三方進而位不中者也故雖有美而尚舍之五正位而居體者也故美在其中而發于事業


陰疑于陽必戰爲其嫌于无陽也故稱龍焉猶未

離其類也故稱血焉夫玄黃者天地之雜也天玄而地黃

坤之上六猶乾之上九也九過五則必亢六過五則必戰此法象自然之數聖人不能違也陰疑于陽者陰數已極得主者疑主矣陰窮于亥下有伏乾窮陰薄陽故曰必戰爲其似于无陽故稱龍猶十月爲良月暢月也窮上反下離其類矣類卽與類行之類乾猶下伏將離未離故稱血玄黃者天地之雜天玄而地黃申解雜義

健順皆純何以云雜純以不易之體言雜以變
易之用言乾與坤雜則爲震爲坎爲艮坤與乾
雜則爲巽爲離爲兌由是六子用事而乾坤之
德終始不窮故雜者易所以窮而變變而通六
十四卦生生不易者也繫辭下傳曰物相雜曰
雜物撰德曰六爻相雜曰剛柔雜居曰雜而不
越皆是此義時解不達雜義以天玄而地黃爲
不得相雜是必獨陽孤陰而後可也造化不幾
息乎

通六爻論之初言順之機二言順之體三言順
之分四言順之時五言順之用六言順之窮

乾  乾坤反對之義

雜卦傳曰乾剛坤柔

六十四卦以陰陽爻位反對者惟乾坤坎離中
孚頤大小過八卦屯蒙而下五十六卦則以上
下反覆爲反對文中子云反者道之動程伯子
云道无獨必對通乎反對之義而天下之能事
畢矣

以二卦爻位論之初陽方長欲其勿用初陰始
凝辯其堅冰乾本生知亦不廢信謹之功坤雖
學知亦有不習之利九三乾道乃革則有日夕
之惕六三下卦已終則有代終之美九四重剛
欲進則疑以止躁六四重陰再闔則括以杜機
九五以中正發九二之君德六五以中正發六
二之至美上九亢而窮動則有悔上六疑而窮
雜則自交總之純乾純坤德无不善他卦有吉
有凶者皆乾坤之偏氣也

自疏

屯

震下
坎上

互坤艮

屯蒙何以繼乾坤上下體之有震坎艮也震始
交坎次之艮又次之先屯後蒙長幼之序也長
子以建侯經綸次子以剛中克家少子以童蒙
元吉三男用事作君作師乾父坤母之權有所
專托矣不用離巽兌三陰者開闢之初陽德方
興羣陰盡伏也自屯蒙至師比凡六卦皆以坎
爲用者坎陽之中震艮陽之偏也坎爲最貴其
本體之爲習坎者居上經諸卦之後其用體之

周易
卷之一
分上下者居上經諸卦之先故坎者上經之綱領也

屯从𠂔一一地形也𠂔穿地尾曲未申也法言曰春者木之菴古𡗗字从屯从日

屯元亨利貞勿用有攸往利建侯

卦中具乾全體而震之初九乾元精神全毓焉故亦曰元亨利貞但一陽在下遇坎互艮而震性好動故勿用攸往然初陽得正爲亨屯之主利早建之以從民望建侯繫于天造之下明侯

之爲天建矣屯豫皆言建侯者震爲長子代父
主嚮下承互坤也亨屯之道惟正能正不正故
曰利貞惟不欲速能成大功故曰勿用有攸往
惟有主能繫人心故曰利建侯

彖曰屯剛柔始交而難生動乎險中大亨貞雷雨
之動滿盈天造草昧宜建侯而不寧

乾坤之後震爲始交坎爲難生凡物胎卵難出
勾萌難申以致世變難平紛紜難解皆難生也
動乎險中必能出險已有大亨貞在內雷雨之

動覆釋亨義動而至雷雨滿盈則通暢之極矣
凡坎在上體者象水之氣升而爲雲屯需是也
坎在下體者象水之液降而爲雨解是也今在
屯而曰雷雨滿盈者自其動後言之也震爲蕃
鮮草象坎水內暗昧象震動坎勞不寧象

象曰雲雷屯君子以經綸

草昧天造也經綸大人造也經象雷之自歛而
分綸象雲之自散而合

初九磐桓利居貞利建侯○象曰雖磐桓志行正

也以貴下賤大得民也

卦辭有專主成卦之主而言者周公首于此爻發之磐大石也互艮之象桓郵表大木也震木之象初有碩大之德而在下如柱石之在土中難進之貌居貞利在我建侯利在民卦言利建侯其事也爻言利建侯其人也爻曰居貞象曰行正居者身行者志也不欲屯膏所謂正也陽貴而陰賤一君而二民初以一陽下四陰濟屯本領在此

王弼曰息亂以靜守靜以俟安民在正弘正在謙爻備斯義宜其得民也

六二屯如逴如乘馬班如匪寇婚媾女子貞不字十年乃字○象曰六二之難乘剛也十年乃字反常也

初大得民得二四也二雖應五而實比初屯如逴如乘馬班如者震爲馬作足班者分布不進猶班師之班乘剛之象二雖乘剛而初九以貴下賤其求二之心不異于求四匪寇也乃婚媾

也而二守貞不字曰女子明初爲丈夫矣坤
十待初歷互坤而上動手險中膏不屯矣而後
字之不可謂非明于擇主而象謂之反常者反
其二五正應之常也管仲相桓公魏徵事文皇
似之九五小貞吉指二也而隱其辭于本爻聖
人爲常道慮深矣

自疏

六三卽鹿无虞惟入于林中君子幾不如舍往吝
○象曰卽鹿无虞以從禽也君子舍之往吝窮也

舉正以從禽
也上脫何字

二四上才位皆柔不能進者三才柔位剛居震之極无德而有求民之心无應而舉濟屯之事躁于進者卽鹿无虞入于林中之象鹿當作麓艮山足曰麓三當互艮之足麓象也虞爲虞人艮爲木堅多節震爲蒼筤竹皆林象三在震動艮止之交曰幾舍之不往非知幾之君子不能嬰母知廢陵母知興其庶乎

六四乘馬班如求婚媾往吉无不利○象曰求而往明也

六二乘震馬六四上六乘坎馬而皆言班如者
三爻俱陰不能自濟必依于彊屯難之時君擇
臣臣亦擇君也四初正應初以貴下賤求爲婚
媾四往而與之共濟剛柔相得膏雨无屯矣故
吉无不利吉以剛柔相得之善言利以濟屯之
功言或謂四求初陰无求陽之理且與以貴下
賤之旨不合謂往五屯膏之主其不能濟屯明
矣而舍初往五可謂明乎但易以自内之外爲
往今四言往者據我適人爲往與需上六言來

月易考 卷之二
據人適我爲來皆變例也勿用攸往者初陽未壯時當磐桓也往者聲氣相應義當進取也此非知人審勢不能故象曰明尚父後車孔明三顧當之 自疏

胡氏曰男下女爲婚初下二婚媾也二之不字非應也初下四婚媾也四之往者應也

九五屯其膏小貞吉大貞凶○象曰屯其膏施未光也

卦惟二陽而初得民五屯膏者震陽動坎陽陷

也坎爲雨陰雨爲膏陰陽和而後成雨九五高
而无民雲不爲雨其膏屯矣小貞爲六二大貞
謂九五雖位皆得正而二有十年之字故吉五
屯其膏羣陰不附適爲得民者雷雨之資故凶
象言施未光爲二陰所掩必待初之動而光也
胡氏曰學易者貴于觀時識變卦有二陽初陽
在下而衆方歸之時之方來者也五陽在上而
陷于險時之已去者也時已去雖陽剛亦无如
之何矣故凶

上六乘馬班如泣血漣如○象曰泣血漣如何可
長也

上六處險之極三非已應五不足歸又去初甚
遠班如之馬將安之乎泣血漣如坎象坎心憂
也田橫隗囂之徒似之

蒙

坎下
艮上

互震坤

蒙从冡取蒙覆不明之義加巾爲幪加水爲濛
加目爲矇皆是也

蒙亨匪我求童蒙童蒙求我初筮告再三瀆瀆則

不告利貞

全卦以九二爲主故彖辭專以九二言蒙非亨也而何以亨蒙自有亨通也孩提知能達于天下如山下源泉雖止而未達原有盈科放海之勢特在教者因其求而導之耳故曰非我求童蒙童蒙求我童蒙謂五我二自謂也初指初陰真心未散懷誠而來求決所疑爲初筮二陰爲再指三三陰指四在山泉水清出山泉水濁濁則山下之泉轉爲溝瀆矣豈得與初筮同告乎

蒙心本正曰利貞

自疏

彖曰蒙山下有險險而止蒙蒙亨以亨行時中也
匪我求童蒙童蒙求我志應也初筮告以剛中也
再三瀆瀆則不告瀆蒙也蒙以養正聖功也

山下有險內險不可處外止莫能進未知所爲
蒙昧之象蒙而亨者九二以亨之道行有剛中
之德而以時發之也記曰當其可之謂時孟子
曰中道而立能者從之惟時中能合一卦之蒙
通爲流泉故亨也下文曰求曰告曰不告正時

中處童蒙求我者真心相契不戒以孚如桴鼓
然故曰志應若我求童蒙則爲有心之感矣初
筮告者九二剛中有源之泉也以有源之泉觸
彼初筮之泉告之以身不言而喻矣再三瀆不
告者泉變爲瀆而復告之祇益其瀆耳故不告
也以上總釋蒙亨蒙以養正釋利貞言蒙卽人
心之正養者勿強其不求勿失之于初筮勿亂
之以再三因其固有通其天真卽直養无害之
謂聖通明之稱蒙聖之反也而曰聖功者以蒙

養明是謂真明舍蒙求明去聖遠矣中庸曰闇而章老子曰明道若昧皆此義也

象曰山下出泉蒙君子以果行育德

山下出泉其一未散其勢未達觀其勢之未達卽果行以濬其流觀其一之未散則育德以敦其化艮山惟靜止則泉源之出者无窮有止而後有行也

初六發蒙利用刑人用說桎梏以往吝○象曰利用刑人以正法也

此初筮告也初大孩心未散蒙昧未通啓而廸之若發覆然刑人可儀刑之人與刑于二女同義指二初與二最親象曰以正法者以已之正法教人所謂以其昭昭使人昭昭也坎爲桎梏物欲糾纏之象禁于未發之謂豫刑之于初所以說其桎梏也過此以往則成遠實之困蒙矣兩吝字相應舊解以刑人爲用刑罰之人非也敷教在寬而後有朴作之刑入學以齒而後有不變之罰觀擊蒙在上九則初非刑罰明矣

自疏

九二包蒙吉納婦吉子克家○象曰子克家剛柔接也

此一卦主爻總攝四陰

陽畫連亘包象包魚包瓜取象同包蒙包上下四陰三勿用取女而言包者不屑之教誨也四獨遠實而言包者中養不中才養不才也納婦指六五五互坤終以陰應陽有婦道二居坎下以卑承尊有子道包與納二虛能受之象克九剛能任之象剛柔接者五以已之柔俯順于二

以與剛接二以已之剛仰承于上以與柔接所謂志應也

六三勿用取女見金夫不有躬无攸利○象曰勿用取女行不順也

此與四爻所謂再三瀆瀆則不告也三與二比三五坤初爲女又變巽爲長女二互震代乾金夫象二包蒙者而勿取乎三何也以其見金夫不有躬也蒙心漸破知見橫生金夫雖曰發蒙如以手指月欲人因指看月耳而不有其躬何

異觀月而忘指哉故道莫妙于昧莫病于見見
最難破必須上九之擊以濟包蒙之窮

自疏

舊說以上九爲金夫女往求男爲行不順與卦
義无涉

六四困蒙吝○象曰困蒙之吝獨遠實也

六四當艮之下是爲山足牢不可移之象困不
復進故吝象曰獨遠實者陽生爲實陰消爲虛
初承二三乘二五應二六四皆无之也

六五童蒙吉○象曰童蒙之吉順以巽也

此童蒙求我也艮小男爲童兼坤順艮止二德
巽以志應言蒙謂之童者養得其正渾然天真
所謂大人不失赤子之心也

王伯厚曰童蒙應于二之剛則吉養之早也童
觀遠于五之剛則吝見之小也

上九擊蒙不利爲寇利禦寇○象曰利用禦寇上
下順也


卦中二陽二明師也上嚴師也明師主包嚴師
主擊艮手擊象上與三應擊蒙擊三也擊其見

也擊其見而所懷來者瞥地勦絕矣爲寇猶爲
衛君之爲禦寇猶禦人口給之禦種種知見到
此情枯智竭无理可申正是擊蒙妙用楞嚴咄
此非汝心使聽者矍然驚怖而宗門機用至于
訶罵皆擊法也三言不順五言順以巽上似逆
而實順順者順其所養之蒙也

易筮曰初六之蒙自二發之內障也見少有著
卽性之牯必脫之而天乃不鑿六三之蒙自上
擊之外障也見有可欲卽躬之賊必禦之而人

乃不侵合而論之互鄉之見初筮也未嘗无誨
包蒙也伯禽之抗納婦也不言何述見金夫也
故進之困蒙也夢求訪落童蒙也楊墨之言盈
天下辭而闢之廓如禦寇也千古師道盡此矣

自疏

屯  屯蒙反對之義

雜卦傳曰屯見而不失其居蒙雜而著

屯蒙皆一陽爲主震一陽見于二陰之下而居
貞固守故不失其居坎一陽雜于二陰之中而

治之使明故著

屯蒙皆坎水屯則雷雨之水爲濟世之甘霖蒙則源泉之水爲作聖之真脉

周易卷之一終